



*Senin, 14 Juni 2021*

**Ogen: Esekiel 3:16-21**



**Kam Jadi Penjaga**



**E**sekiel eme sekalak nabi/persuruhan Tuhas. Dahin si iendesken man bana eme jadi penjaga kegeluhen bangsa Israel. Semalna i bas kuta-kuta Israel ibahan tembok dingin ibahan si erjaga kuta. Tugas penjaga kuta eme neheken berita man anak kuta kai-kai saja si nandangi jadi man anak kuta; ancamen entah berita kemenangan/keriahen. Emaka sekalak penjaga harus mejelimet, megermet, la banci tertunduh i bas paksa ertugas sebab keselamatan kuta mbelin kel ipengaruhi arah berita si isehken penjaga. Katawri e pe ia arus siap siaga. Ipastikenna kota si ijagana e aman gelah masyarakat pe teneng i bas ndalani kegeluhenna.

Esekiel e ibere tugas jadi penjaga i bas bangsa Israel (ay. 17). Ia me sinehken berita persinget man bangsa Israel. Mpersingeti kalak jahat segelah jera i bas dosana nari; mersingeti kalak bujur si mbenaken erbahan kejahatan, mersingeti kalak bujur segelah tetap ngeluh i bas kebujuren. Si enda kerina arus ipeseh, kune la ipeseh maka nabi Esekiel iidoi Dibata i bas ukumen sialoken bangsa Israel enda, janah kune berita e ipeseh tapi la ibegiken bangsa e lanai jadi persoalan man Esekiel, sabap ia terkelin; la iidoi Dibata ia. Enda me tugas si arus ilakoken Esekiel selaku nabi i tengah-tengah bangsa Israel.

Genduari man banta pe iendesken dahin enda. Kita enda eme bangsa pilihan Tuhan, imam-imam Raja, bangsa sekerajangen Dibata, anak-anak Dibata si ipilih guna *meritaken perbahanen-perbahanen Dibata si mbelin* (1 Pet. 2:9). Dahinta eme njagai keluargata, sekelewetta bagape gerejanta. Pedauh sikap *masa bodoh, ena labo dahinku ras sidebanna*. Jadilah penjaga, si pesehlah berita keselamatan sebab kam ras aku isuruh guna nelamat ken ia arah berita si isehken Dibata.

*Penjaga arus peseh berita sebab e erguna man keselamatan*